



Jadual Pembacaan Khutbah Jumaat

Siri 7/ 2023 (Bulan **JULAI** Tahun 2023)

تاریخ	تاجوق	ب
7 Julai 2023M/ 18 Zulhijjah 1444H	Khutbah AADK: Dadah Dijauhi, Negara Harmoni	1.
14 Julai 2023M/ 25 Zulhijjah 1444H	Sempena Awal Muharram: Hijrah Nabi	2.
21 Julai 2023M/ 3 Muharram 1445H	Istighfar: Penyuci Diri	3.
28 Julai 2023M/ 10 Muharram 1445H	Isteri Amanah Suami, Usah Khianati	4.
خطبه کدوا		

دبیایاء:



زکاة فولاو فینغ

دتریتکن:



جابتن حال إحوال اگام اسلام فولاو فینغ

***Jawatankuasa Panel Semakan Teks Khutbah
Negeri Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Isteri Amanah Suami, Usah Khianati

28 Julai 2023M/ 10 Muharram 1445H

الْحَمْدُ لِلَّهِ الَّذِي جَعَلَ حُبَّهُ أَشْرَفَ الْمَكَاسِبِ، وَأَعْظَمَ الْمَوَاهِبِ،

وَأَشْكُرُهُ عَلَى نِعْمَةِ الْمَطَاعِمِ وَالْمَشَارِبِ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ الْمُنَزَّهَ عَنِ النَّقَائِصِ وَالْمَعَايِبِ،
وَأَشْهَدُ أَنَّ سَيِّدَنَا وَنَبِيَّنَا مُحَمَّدًا عَبْدُهُ وَرَسُولُهُ الدَّاعِيَ إِلَى الْهُدَى وَالطَّهَارَةِ مِنَ
الْمَثَالِبِ.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ الَّذِينَ أَحَبَّهُمُ اللَّهُ بِالْإِبْتِلَاءِ
وَالْمَصَائِبِ.

أَمَّا بَعْدُ، فَأَوْصِيكُمْ وَنَفْسِي بِتَقْوَى اللَّهِ؛ فَهِيَ سَبِيلُ النَّجَاةِ وَالْفَلَاحِ لِعِبَادِهِ
الْمُؤْمِنِينَ.

MUSLIMIN RAHIMAKUMULLAH,

Takwa kepada Allah **سُبْحَانَهُ وَتَعَالَى** adalah tuntutan yang tertinggi dalam Islam. Justeru pada hari yang mulia ini, khatib menyeru kepada seluruh kaum muslimin supaya kita bertakwa kepada Allah **سُبْحَانَهُ وَتَعَالَى** dengan melaksanakan segala suruhan-Nya dan meninggalkan segala larangan-Nya. Mudah-mudahan dengan keimanan dan ketakwaan, kita menjadi insan yang soleh serta memperoleh kebaikan dan keberkatan di dunia dan di akhirat.



Marilah kita tumpukan perhatian kepada khutbah yang akan disampaikan. Cukup-cukuplah kita dengan perbuatan-perbuatan yang boleh mengurangkan ganjaran pahala Jumaat. Usah bercakap-cakap, simpanlah telefon bimbit untuk seketika. Semoga khutbah yang disampaikan dapat diambil panduan dan pesanannya. Izinkan mimbar untuk membawa hati dan jiwa sekalian yang hadir menghayati khutbah yang bertajuk: **“Isteri Amanah Suami, Usah Khianati.”**

SIDANG JEMAAH YANG DIKASIHI ALLAH,

Setiap insan mempunyai tanggungjawab sama ada sebagai seorang bapa, ibu, suami, isteri, anak dan sebagainya. Tanggungjawab anak ialah mentaati kedua ibu bapanya manakala tanggungjawab ibu dan bapa ialah mendidik dan memberi nafkah kepada anak-anak. Tanggungjawab suami pula ialah menjaga kehormatan isteri dan menyediakan nafkahnya.

Nafkah merupakan perkara yang wajib ke atas seorang yang bergelar bapa atau suami. Sekiranya seorang bapa atau suami culas dan mengabaikan kewajipan ini maka ia akan memberikan kesan yang buruk terhadap para isteri dan anak-anak.

Saban hari masalah isteri dan anak-anak yang diabaikan oleh para suami dan bapa sentiasa berlaku sehingga menyebabkan berlaku tuntutan nafkah di Mahkamah Syariah.

Mutakhir ini semakin ramai para suami atau bapa yang mengabaikan perintah nafkah anak atau isteri. Ini dapat dilihat melalui statistik yang dikeluarkan oleh Jabatan Kehakiman Syariah Malaysia. Pada tahun 2020 sebanyak 1,288 kes pelanggaran perintah nafkah anak atau isteri manakala pada tahun 2021 sebanyak 750 kes dan tahun 2022 sebanyak 1,316 kes.



Peningkatan jumlah kes ini menunjukkan betapa ramai para suami dan bapa tiada kesedaran terhadap betapa pentingnya pelaksanaan perintah nafkah anak atau isteri melalui perintah Mahkamah Syariah. Perkara sebegini telah lama diperbincangkan melalui Mesyuarat Majlis Kebangsaan Hal Ehwal Islam Malaysia pada tahun 2007 yang telah mencadangkan kepada Jabatan Kehakiman Syariah bagi menyelesaikan permasalahan ini. Susulan itu pada tahun 2008 tertubuhlah Bahagian Sokongan Keluarga (BSK).

SIDANG JUMAAT YANG BERBAHAGIA,

Khatib ingin menyeru kepada para bapa mahupun suami supaya tidak mengabaikan perintah mahkamah ini. Kebanyakan para bapa atau suami yang tidak menghormati perintah mahkamah terdiri dari pelbagai latar belakang. Bukan sekadar berlaku di kalangan mereka yang mempunyai masalah penagihan dadah dan malas bekerja namun tidak kurang juga berlaku di kalangan golongan professional seperti doktor, pensyarah, ahli perniagaan dan sebagainya.

Di sini khatib ingin mengambil kesempatan untuk memaklumkan kepada sidang Jemaah semua, bahawa Bahagian Sokongan Keluarga (BSK) ini ditubuhkan bagi membantu para isteri yang teraniaya untuk menguatkuasakan dan melaksanakan perintah-perintah mahkamah berkaitan nafkah anak dan nafkah isteri termasuklah nafkah iddah serta mut'ah.

Bahagian ini ditempatkan di Jabatan Kehakiman Syariah negeri-negeri seluruh Malaysia dan ada yang ditempatkan di Jabatan Agama Islam Negeri. Antara fungsi bahagian ini adalah:

Pertama: Memberi nasihat perundangan syariah kepada pihak-pihak secara khusus berkaitan tuntutan nafkah serta tatacara penguatkuasaan dan pelaksanaan penghakiman di Mahkamah Syariah.

Kedua: Memberi khidmat nasihat dan bimbingan kepada para isteri untuk menfailkan kes di Mahkamah Syariah bagi mengambil tindakan kepada suami atau bapa yang mengabaikan tanggungjawab.

Ketiga: Menyediakan khidmat guaman bagi mewakili para isteri dalam apa-apa tuntutan. Manakala *bailif* pula melaksanakan perintah pelaksanaan penghakiman dan penguatkuasaan perintah mahkamah sama ada secara tangkapan, lelongan, sitaan dan jualan. Ini adalah bagi memastikan sesuatu perintah dipatuhi.

Keempat: Menguruskan bantuan kewangan sementara, dalam bentuk pendahuluan nafkah kepada pemiutang penghakiman (bekas isteri dan anak-anak) yang menjadi mangsa kegagalan pembayaran nafkah oleh penghutang penghakiman (bekas suami atau bapa).

Konsep ini bertepatan dengan firman Allah **سُبْحَانَهُ وَتَعَالَى** dalam Surah al-Maidah ayat 2:

.... وَتَعَاوَنُوا عَلَى الْبِرِّ وَالتَّقْوَىٰ ۖ ... ﴿٢﴾

Maksudnya: "...dan bertolong-tolonganlah kamu dalam perkara kebaikan dan taqwa."

SIDANG MUSLIMIN YANG DIMULIAKAN,

Mimbar menyeru para suami dan bapa yang mempunyai perintah mahkamah, laksanakanlah perintah nafkah tersebut kerana perintah mahkamah merupakan perintah *ulil-amri* dan mentaati *ulil-amri* adalah satu kewajipan. Firman Allah **سُبْحَانَهُ وَتَعَالَى** dalam Surah an-Nisa' ayat 59:

يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولِيَ الْأَمْرِ مِنْكُمْ فَإِنْ تَنَازَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِنْ كُنْتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا ﴿٥٩﴾

Maksudnya: “Wahai orang yang beriman, taatilah Allah dan taatilah Rasul (Muhammad) serta Ulil Amri (orang yang berkuasa) dalam kalangan kamu. Kemudian, jika kamu berbeza pendapat (berselisihan) dalam sesuatu perkara, maka kembalikanlah kepada (kitab) Allah dan Rasul-Nya (sunahnya) ,jika kamu benar-benar beriman kepada Allah dan Hari Akhirat. Yang demikian itu adalah lebih baik (bagimu) dan lebih elok kesudahannya.”

MUSLIMIN RAHIMAKUMULLAH,

Mengakhiri khutbah, khatib ingin berpesan kepada diri sendiri dan Jemaah sekalian bahawa penyelesaian kepada masalah pengabaian nafkah isteri dan anak dapat dihindari sekiranya langkah-langkah berikut diikuti:

Pertama: Memahami bahawa menyediakan nafkah secukupnya adalah wajib ke atas seseorang suami atau bapa dan mengabaikannya adalah haram di sisi agama.

Kedua: Sentiasalah berusaha mencari rezeki yang halal dengan tekun bekerja dan ikhlas kerana Allah **سُبْحَانَهُ وَتَعَالَى**.

Ketiga: Menyedari bahawa nafkah yang diberikan merupakan sedekah kepada anak dan isteri.

Keempat: Hendaklah mematuhi perintah mahkamah sekiranya diperintahkan membayar nafkah.

Firman Allah dalam Surah at-Talak ayat 7:

لِيُنْفِقْ ذُو سَعَةٍ مِّن سَعَتِهِۦ وَمَن قُدِرَ عَلَيْهِ رِزْقُهُۥ فَلْيُنْفِقْ مِّمَّا ءَاتَاهُ اللَّهُ لَا يُكَلِّفُ اللَّهُ
نَفْسًا إِلَّا مَا ءَاتَاهَا سَيَجْعَلُ اللَّهُ بَعْدَ عُسْرٍ يُسْرًا ﴿٧﴾

Maksudnya: “Hendaklah orang yang mempunyai kesenangan memberi nafkah menurut kemampuannya dan orang yang terbatas rezekinya hendaklah memberi nafkah daripada harta yang diberikan Allah kepadanya. Allah tidak membebankan seseorang melainkan (sesuai) dengan apa yang diberikan Allah kepadanya. (Orang yang kesempitan hendaklah ingat bahawa) Allah akan memberikan kesenangan setelah berlakunya kesempitan.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،
إِنَّهُ هُوَ الْغَفُورُ الرَّحِيمُ.



Khutbah Kedua Bulan Julai

(Bagi Bacaan pada 28 Julai 2023 bertemakan “Ekonomi”)

2023M/ 14445H

الْحَمْدُ لِلَّهِ عَلَى آلائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزَنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Gagasan Malaysia Madani merupakan satu dasar yang merangkumi pembangunan negara dalam semua aspek termasuk ekonomi yang adil dan mampan. Ia bertujuan memberi manfaat kepada semua lapisan masyarakat dan menggalakkan kebajikan sosial di samping menurunkan kadar kemiskinan tegar.



Salah satu usaha memperkasakan pertumbuhan ekonomi negara yang komprehensif adalah melalui kewujudan iklim pelaburan yang kondusif bagi usahawan dan pelabur. Ia melibatkan usaha untuk menambah baik peraturan dan dasar berkaitan pelaburan, mengurangkan birokrasi dan menyediakan insentif yang tepat untuk menggalakkan pelaburan dalam pelbagai sektor. Hal ini bagi menarik lebih banyak peluang pelaburan, baik dari dalam atau luar negara seterusnya dapat merancakkan pertumbuhan ekonomi Malaysia. Kesemua aktiviti perniagaan dan muamalat tersebut hendaklah berpaksikan prinsip dan etika Islam. Integriti, kejujuran dan keadilan perlu diselarikan sebagaimana firman Allah dalam Surah Al-A'raf ayat 33 yang bermaksud:

“Katakanlah, Sesungguhnya Tuhanku hanya mengharamkan perbuatan-perbuatan yang keji sama ada yang nyata mahupun yang tersembunyi dan perbuatan dosa serta perbuatan menceroboh tanpa alasan yang benar. Dan (diharamkan-Nya) kamu menyekutukan sesuatu dengan Allah sedangkan Allah tidak menurunkan sebarang bukti (yang membenarkannya) dan (diharamkan-Nya) kamu mengatakan sesuatu terhadap Allah yang tidak kamu ketahui.”

Melalui pembangunan ekonomi yang berteraskan nilai-nilai Islam ini, kita dapat mewujudkan masyarakat yang adil, stabil dan sejahtera, seterusnya merealisasikan gagasan Malaysia Madani dalam erti kata yang sebenar, insha-Allah.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ، اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ
أُمُورِنَا.

اللَّهُمَّ وَفَّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنِ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠﴾ فَادْكُرُوا اللَّهَ الْجَلِيلَ يَذْكُرْكُمْ،
وَاشْكُرُوا عَلَىٰ نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١١﴾